

Taitasi peba owera ie Pauro ro gemeiriai-ro

¹ Mo Pauro ie nedi peba titi owera ro mo ro nisioidiro Taitasi oro aboto. Godi edi woko ro mo ro wisa tato se nemesioidirotiti, ibose mo Iesu Keriso ro kotiodorai dubu e. Mabu Godi ro urubia keba se ta-gihodowa nou kowasoro urubia to ararasoro ri. Ina mo ro nedi woko ro nou ri nisioidiro nou urubia kimibiria pupuwo kiwaititi aboto, ibose neio ro morobise tuputupu tanaro isioidiro ri.

² Neio umoro kiamo modobo ie ibo neio Godi mutu womu tato womu tato aise ama-irowomidiro-ri. Nou ro duriomoro ido to gosioidiro, tauo keba se nedi owera ro nou ro nou gasaubiai-ro. Godi karasaubuti owera karo pua, nou ro morobise owera karo ie.

³ Ina noudo ie Godi ro nedi tau ro nou gohodowa, nou ro mea owera Iesu sapuwo to urubia aboto nato gowapotai-ro. Nou ro nedi tanaro ro na-gosioidiro taie mo woko nou ro aise nomia-ro, urubia mea owera imowauti ri Iesu sapuwo to. Nimo kiapopo dubu Godi mo nou ro nemowapotai-ro nedi woko ro osioidiro ri.

⁴ Taitasi oro mo ia morobise mere to napoi, nedi peba titi owera ro oro ia aboto nisioidiro. Neitiro atu se kimibiria maumo ato kaupoti ie.

Wisa tato kiwarebai, miro mutu Abera Godi nimo kiapopo dubu Iesu mutu, neitiro aboudo ie.

Iesu urubia etio ro emeauri-dumo neio sapuwo to ie

⁵ Taitasi oro Kiriti Ura ato nou ri nemeserai mabu mo ro auna woko ta-nimeserai iporeawado tato, oro ro nou ba-dimododiawado. Oro ro urubia sabowa gabogabo ato ba-diaubo Iesu urubia kemeauri urubia to ararasoro na. Oro mo ro keba se beda oweru to nemowautiti nou se ba-disioidiro.

⁶ Iesu urubia kemeauri urubia neio modobo ie ata ubauba tato korowomidiro. Ibose neio modobo ie erere se simara ia orobo mutu komidiro.

Neio edi merebusere ro modobo ie kimibiria merebusere to kararasoro. Nedi merebusere ro modobo pua siripo tanaro kisioidiro, ibose mamio abeamio oweru kirowidiro tato korowomidiro.

⁷ Mabu Iesu urubia kemeauri urubia Godi edi woko ro neio aboto gaiwai-ro neio ro mea se emesioidiro ri, ina neio modobo ie ubauba tato se korowomidiro.

Neio modobo pua keremowabu, ibose arua urubia ro kimowauti oweru ubi tato to kiasoro, neio modobo pua serawo samo to koititi, ibose neio modobo pua auna kidio urubia to kararasoro, neio modobo pua karaberemo, ina neio ro modobo pua arua urubia kisaubuti mani piro to kimade.

⁸ Kaupoti nedi urubia ro modobo ie apira urubia kiworohuti. Idaibo urubia neio auna ubi ie meamea tanaro se kisioidiro. Neio ro sirio tanaro kisioidiro maumo ato, durupi aise kimododidiro modobo ie. Neio modobo ie Godi sosoro gabo ato tuputupu urubia to kararasoro. Neio modobo ie pokiri iopu tato se

korowomidiro, ibose neio keremiro mea mino to kiwaboi.

⁹ Mo iana owera ibo ie Iesu urubia kemeauri urubia neio modobo ie koko se kirarebidiro morobise kitamudiro aboudo. Neio neitiro ro beda sosoro nitamudiro-rido, nedi kitamudiro ro nou se ba-dibodoro-mo. Mabu nedi kemeauri urubia ro kimibiria urubia ie, neio ro pupuwo modobo ato amadimi-imowaititi-ri. Ina beda urubia ro ebeiouti-dumo nedi mea kitamudiro owera ro, neio modobo ie Iesu urubia kemeauri urubia ro paea se kituputiwado.

Ba-diraroweauti, karasaubuti kitamudiro urubia toroho-dumo

¹⁰ Mo ro nedi owera ro nou ri nutura, mabu Kiriti Ura ato karasaubuti urubia iato torowomidiro, neio ro Godi edi morobise kitamudiro owera ro aise owasiouti-dumo. Nedi urubia ro neio ro urubia dorogora se mabu tato owera to aise itamudiro-dumo. Idaibo arua urubia imatigi-dumo bagea owera to na-itamudiro-dumo, ina neio ro imaragoidiro ri ibo nou morobise owera nou se ie. Arua karasaubuti kitamudiro urubia neio Iu sabi sirio ibodoro-dumo. Nedi urubia ro auna se iaro-dumo Iesu kowasoro urubia ro Iu urubia iedi sabi sirio ro kibodoro aboto, idaibo dubu takamai kiasio kioriouti.

¹¹ Neio ro idaibo kitamudiro to na-itamudiro-dumo, neio oro ro ba-didiobo, modobo pua karasaubuti kitamudiro kiworoho. Neio ubi ie kimibiria urubia arua moto ato na-orowomidiro, neio edi kimibiria ro ubauba imowaititi ri, ina mani kimade kawa imade rie neio aboudo.

¹² Neio simara ia mea muro dubu ata ro oweru keba se ta-giwauti ibo, 'Kiriti urubia abato karasaubuti towamo, ibose neio serawo tumu na sosoro ie. Neio simara niro itame iromosoratiti-dumo, ina auna karaserawado urubia ie, saiki imamotorotiti-dumo.'

¹³ Nedi mea muro dubu ro beda oweru garo Kiriti Ura urubia sapuwo to abora morobise to notororosioidiro-dumo. Ina noudo ie idaibo bagea kitamudiro urubia binio to aise gi-imowapotaiddiro-ri ibo neio ro urubia ubauba gabo to iwou-dumo. Neio oro ro modobo ie idaibo kimadowere, morobise kitamudiro oweru neio ro mea se kimibiria aboto.

¹⁴ Ina neio ro Iu urubia tagara abeamio totomu nato aise imibiria-ri pua. Ibose urubia ro morobise kitamudiro huru etio ro gemowou-rimo, ibose simara sabi na-gisioidiro-rimo, neio edi bagea kitamudiro oweru ro irowidiro-ri pua.

¹⁵ Etio ra Godi sosoro gabo ato mea se na-orowomidiro, neio meamea kimaragoidiro mutu e, ibose neio imese marea tato ia ie. Kaupoti urubia etio ra mareamarea mutu ibose Iesu Keriso edi mea oweru ro nato imibiria tato, imese sirio namabu neio niro turi ato karatidiai ie, mareamarea ia se kiamo ie. Neio kimaragoidiro patu simara ubauba ro ta-gimowai, ibose neio ro nakara se umoro koi modobo pua ibo nedi tanaro ro mo ro na-nisioidiro meana ra o ubauba ra.

¹⁶ Nedi karasaubuti kitamudiro urubia ro neio ibo iarotiti-dumo, 'Nimo umoro ie Godi.' Kaupoti neio ro durupi to ubauba na-isioidiro-ri-titi-dumo neio umoro pua Godi. Nedi karasaubuti

kitamudiro urubia ro nakere pogo sosoro ie, ubauba nibo kimasiai ato imese ubauba ie. Neio ro Godi huru gemowou-rimo ibose neio aboudo ata gabo tato ie meamea tanaro kisioidiro aboto.

2

Morobise oweru kibodoro ibo ie tanaro kisioidiro mutu

¹ Kaupoti oro aboto oweru ibo ie Taitasi, modobo pua oro karasaubuti urubia sosoro korowati. Oro ro modobo ie urubia morobise oweru Iesu sapuwo to mea mino to kitamudiro.

² Ohu to dubu kimibiria mutu ba-dimowapotai ibo neio durupi modobo ie mea mino to kimododidiro. Ina neio modobo ie urubia ro kimowabu, mabu neio mea mino to orowomidiro, durupi ubauba aboudo kidiobuti, pupuwo to kiwotoi. Neio edi kimibiria ro mea se kiamo modobo ie, ibose nirimagare maumo ato se kiroromowado modobo ie, ina koko tau kiauri ato neio huru to korowame pua.

³ Ina atu sosoro tanaro ie ohu to mamio kimibiria mutu nou ba-misioidiro-mo, neio korowomidiro maumo ato modobo ie Godi neio ro sirio tau aise kemododidiro. Ibose neio ro modobo pua arua urubia kiasoro. Neio ro kidio auna tanaro to apoi mamo.

⁴ Kaupoti neio ro meamea tanaro nou gi-irimisioidiro-ri, orio mamio umoro kiaiwo sapuwo to. Ohu to mamio ro meamea tanaro namadimi-iwawuti-ri, orio mamio ro idaibo amadima-aratamudiro-ri mea korowomidiro keremiro. Idaibo uramio merebusere mutu nirimagare amadimi-imati-ri.

⁵ Ibose neio simara durupi mea mino to kimododidiro, ata ubauba tato se korowomidiro. Orio mamio ro moto woko auna se kisioidiro ie, urubia kamade mutu modobo ato kiwarebai ie, ina uramio oweru kirowidiro. Ina idaibo tanaro neio ro kisioidiro ato, arua urubia ro ubauba oweru aro-ri pua Godi edi oweru ro nou sapuwo to.

⁶ Ina ibose orio domere sapuwo to neio ro nou ba-misioidiro-mo. Neio oro ro auna oweru to ba-dimowauti neio durupi ubauba tanaro kisioidiro aboudo, modobo ie kimododidiro.

⁷ Taitasi, orio domere ro oro amadimi-iauri-ri oro ro meamea tanaro se nama-isioidiro-ri, ina neio ro meamea tanaro ibose to amadimi-isioidiro-ri. Godi sapuwo to urubia oro ro nama-itamudiro-ri, modobo ie neio oro ro tuputupu mino to kitamudiro.

⁸ Ibose oro ro modobo ie morobise mea oweru pupuwo to kitamudiro Iesu Keriso sapuwo to. Ina ata dubu ata ro modobo pua bagea oweru to kapoi. Ina noudo ie oro ro meamea tanaro nama-isioidiro-ri, oro masawe etio ro iauri-dumo neio siripo amadimo-oi-ri. Neio ro ata oweru ata utura-ri pua nimo sapuwo to.

⁹ Taitasi, kimibiria urubia wisa tato woko na-isioidiro-dumo umoro ba-diwaititi neio ro modobo ie simara eputa urubia ubi tanaro se kisioidiro, neio ro sirio tau kamade aise kiwaititi. Neio ro modobo pua eputa dubu oweru saro kemasio.

¹⁰ Nakomu neio aboudo piro to imade mamu. Kaupoti wisa tato woko dubu ro modobo ie durupi to morobise to kowaweia ibo nou ro woko mea se isioidiro. Ina noudo ie sirio urubia

ro nou namadimo-owea-ri, morobise kitamudiro
Godi sapuwo to nimo kiapopo dubu, neio auna
ubi amadimo-oi-ri morobise kitamudiro ower
kirowidiro aboto.

Godi ro giapopo-ro urubia ubauba aboudo

¹¹ Kimibiria urubia ibo ba-ditamudiro, mabu
Godi ro edi nirimagare ro ta-gowapotai-ro imese
urubia ubauba aboudo iapopo ri.

¹² Godi edi wisa tato nirimagare ro nimo nou
ro ibo nitamudiro-die, sopu duriomoro edi
ubauba ubi tanaro ro urubia ro
na-isioidiro-dumo, durupi neio aboto
iaidodorowado mamo. Nedi tau ro nato Godi edi
wisa tato nirimagare ro nou ro ibo
nitamudiro-die, modobo ie nimo ro durupi
kimododidiro, ibose tuputupu tanaro se
kisioidiro. Ina Godi ubi tanaro se kisioidiro.
Nimo abora idaibo mino to korowomidiro
modobo ie,

¹³ ina kamade mutu neremotoititi-dumo Iesu
Keriso nedi duriomoro neito
namadi-orowameai-ri nou auna woroworo
mutu amadi-orowapotai-ri. Nou nimo Godi ie,
ibose nimo kiapopo dubu e.

¹⁴ Nou simara durupi gaiwai nimo imese
ubauba aboudo iapopo ri, ubauba
imowagareawado ri nou ia simara urubia to
ararasoro ri. Nimo abato auna ubi kiamo ie
meamea tanaro kisioidiro aboto.

¹⁵ Ina noudo ie Taitasi, ower nou se ie, oro ro
urubia nouto aise ba-ditamudiro. Kimibiria
tanaro pupuwo ba-dimowaititi, ibose ubauba
tanaro kisioidiro urubia paea se
ba-dimowapotaidiro ibo nio ro ubauba tanaro

isioidiro-dumo. Oro abato pupuwo korosa towamo, ina noudo ie oro ro beda oweru karo ra modobo pua oro ata dubu ata ro sopu to kowororuwoidiro.

3

Meamea tanaro se gi-isioidiro-ri

¹ Taitasi, kimibiria urubia umoro aise gi-iwaititi-ri ibo neio ro gabamani urubia, sabowa kiauri urubia mutu mea mino to kimododidiro modobo ie, ina neio oweru se gi-irowidiro-ri. Kimibiria urubia modobo ie sirio tau keremododiai meamea tanaro se kisioidiro arua urubia aboto.

² Kimibiria urubia oweru karo ato modobo pua arua urubia ubauba kiwaititi. Kimibiria urubia abato owamo pua keremaro, modobo ie neio abato miro ro kiamo. Kimibiria urubia modobo ie nakara se sopu to korowororuwoidiro. Neio ro modobo ie sirio tau morobise mea muro tanaro se kisioidiro imese sirio urubia aboto.

³ Nimo keba se kimaragoidiro tato urubia ie, Godi umoro tato urubia sosoro nirowomidiroiti. Ina nimo ro Godi ubi tanaro huru nimowou-rimo Satani ro na-nisaubutiti. Nimo ubauba tanaro sowake urubia to nararasorotiti-mo ibose durupi edi ubauba ubi ro nou nisioidiroiti-mo. Nimo ubauba to na-nirowomidiroiti ina arua urubia nimo ro oriori niaurititi-mo. Ibose neio nimo ro aise nihoiotiti-mo.

⁴⁻⁶ Kaupoti nimo Godi ro ta-niapopo-ro edi ubauba ro nou aboudo. Nimo ubauba tanaro kisioidiro urubia sekere, kaupoti Godi ro auna nirimagare nimo aboto ta-gowapotai-ro, nimo

nou ro ubauba aboudo nato niapopo-ro. Nou ro nedi tanaro ro nou mabu ato gosioidiro mabu nou auna nirimagare gowapotai-ro nimo aboto. Ibo pua nimo ro edi meamea tanaro ro na-nisoiroidititi-dumo nou sapuwo to kiapopo. Ina nimo kiapopo dubu Iesu Keriso nou ro Godi ubi ato Tarena Urio aise gemeiriai-ro nimo aboto. Tarena Urio ro nimo ubauba ta-nimowiouti taie orio keremiro nou ro aise nimia-ro.

⁷ Godi ro nedi tanaro ro nou mabu ato gisioidiro nimo ro kamade mutu a-nemotoititi-dumo womu tato womu tato keremiro, saiki ata anamadimi-irahidimai-ri. Ina nimo Godi ro mea tuputupu urubia to nato ta-niapoi.

⁸ Nedi owera ro morobise ia owera ie, urubia ro koko se nou kirobidiro modobo ie. Ina noudo ie oro mo ro a-nemowapotai ibo, mo ubi ie urubia oro ro inaina nedi owera ro aise kimowauti. Oro ro kimowauti ato, etio ra na-imibiria-dumo Godi edi wisa tato kiwarebai ro nato, neio ro sirio tau meamea tanaro aise amadimi-isioidiro-ri. Nedi owera sirio ro imese meamea owera ie imese urubia meana sapuwo to ie.

⁹ Kaupoti gu kiwaseidiro sapuwo to ibose kimaragoidiro tato owera na-iwaseidiro-dumo aise ba-dimeserai. Mose sabi kibodoro sapuwo to urubia owera to kororobai ato, oro aradabu mamō. Nedi tanaro ro neio ro na-isioidiro-dumo, nio aboto neio ro ata meana ata owou-ri pua, neio ro imese kiwarebai tato tanaro isioidiro-dumo.

¹⁰ Karapeputi urubia neio oro ro koko owera

ba-dimio ina ata tau umoro ba-diwai, ibo neio ro ubauba tanaro isioidiro-dumo. Umoro kiwai saro gabo ato oro owera neio ro kirowidiro tato, huru ba-dimowou.

¹¹ Taitasi oro umoro nato aise ba-doi ibo nedi urubia ro kerewaekerewae urubia ie, ibose Godi gabo neio ro ta-gaseperai-dumo. Neio simara ubauba ro tiwapotaidiro-dioumo ibo nou sapuwo to Godi ro ubauba wisa ama-imio-ri.

Iana umoro owera ie

¹² Mo ro anama-imowapotai-mari Atemasi ra Tikikasi ra neitiro ata oro aboto ou ri. Neitiro ata oro aboto nama-orowateai-ri taie oro ioudo ba-dabu-ro mo aboto, mo oro ro Niko Sabowa ato nama-owea-ri. Mabu gawia tau ro ama-owamo-ri mo ubi ie Niko Sabowa ato komidiro.

¹³ Ibose nedi dubu teibo ro Senasi ra Aporosi ra (Senasi sabi umoro dubu e), neitiro ioudo ata moro to namada-aimai-ri, oro ro neitiro mea mino to ba-diwarebai-ma. Neitiro kiwou namabu neito aise ba-diwarebai-ma.

¹⁴ Taitasi Kiriti Ura ato neitiro kimibiria borubi ba-ditamudiro urubia kiwarebai sapuwo to ibo, neio ro modobo ie meamea tanaro se kisioidiro. Ina noudo ie mibo tau ato nedi urubia ro neio ro amadimi-iwarebai-ri, neio korowomidiro kawa korowomidiro modobo pua.

¹⁵ Sirio urubia nato na-orowomidiro mo mutu atu se nimo ro oro aboto kamade owera nemeiriai-dumo. Nimo nirimagare kimibiria maumo ato etio ro nimati-dumo, kamade owera nimo aboudo ie neio aboto.

Godi edi wisa tato nirimagare ro nio abato
aise ba-mowamotiti.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4